

في لبنان

علم وخير ٢٩/أد

اليوم حابّة اتوجّهلكن يا ولادنا، ولاد المفقودين وولاد المش مفقودين، انتو كلكن يلي هون مختلطين مع بعضكن.. ما حدا قادر يميّز بيناتكن: مين ولاد المفقودين ومين ولاد العاديين، وعم أتوجه كمان ليلى ما قدروا يجو اليوم.. المهم انو تبقوا سوا وما تنفصلوا..

حابّة اليوم خبركن خبرية كثير بشعة.. كتار منكن صاروا بيعرفوها وكتار ما بيعرفوها بعد..

انتو عايشين فوق مقابر، بالطبع مش عم احكي عن المدافن الطبيعية.. عم احكي عن مقابر جماعية مخبّاية تحت الأرض بشوية تراب.. يمكن عم قول هالشي بشكل كثير فحّ، ما تاخذوني بس هيدي حقيقة.. مقابر عم تمشوا فوقها، عم تصقوا السيارات فوقها، عم تعمروا فوقها، عم تسكنوا فوقها.. عم تاكلوا وتشربوا وتسهروا وترقصوا وتلعبوا فوقها...

هلق رح خبركن تاريخ: مثل اليوم من ثلاثين سنة (١٧ تشرين الثاني سنة ١٩٨٢) عملت نداء بالراديو لأماتكن واخواتكن تانتلاقي.. مش كثير بعيد من هون، عا كورنيش المزرعة قدام جامع عبد الناصر.

هالنداء عملتو بعد ما كان مارق شهر تقريباً عا خطف عدنان، زوجي. بالأول كنت بثشت اركض لوحدي، من زعيم، لرئيس، لنايب، لرئيس حكومة تا يساعدونى.. كل شي طلع منن كلام بيشبه بعضو: "يا حرام.. الله يساعذك بعدك صبيّة صغيرة.. عا كل حال في ناس مثلك اجو تشكو.." طيب، مين هالناس؟ ما حدا منن قدر يعطيني ولو اسم واحد..!!

ساعتا فكرت انو لو بلاقي تنين متلي، بس يكونو أطول مني وأكبر، منصير أقوى ومنشوف شو فينا نعمل سوا، وميشان هيك عملت النداء.

وقت جيت عالموعد، لقيت أكثر من ١٠٠ مرا مجمعين قدام الجامع.. كان في معن ولاد كمان.. ما قدرت صدق.. هالقد في ناس انخطفن ناس بيحبوهم مثل ما صار فيني أنا وولادي!! ما قدرت استوعب انو هالقد في ظلم.. وفرد دفعة..!!

نملّ جسمي، ورم راسي.. وقلت بيني وبين حالي أكيد لازم نعمل شي، بسّ شو، ما
نعرف! بعد شووي وقفنا بكي، مسحنا دموعنا، حملنا وجعنا عا كتافنا، نظمنا صفوفنا
ومشينا .. وهيك بلّشت أول مظاهرة لأهاليكُن (١٧ تشرين الثاني ١٩٨٢).

مشينا، ركضنا، اعتصمنا، سكرنا معابر بين الغربية والشرقية، حرقنا دواليب
(sorry)..هلكننا.. بس بصراحة مش هودي الأشياء يلي تعبّونا ، ولا الرصاص
والقذائف..يلي هدّنا هوّي الطريقة البشعة يلي تعامل فيها المسؤولين معنا وكذبّين
علينا..

من ثلاثين سنة كنا تقريباً بعمركُن هلق ، أصغر أو أكبر شووي..أنا كان عمري ٣١
.. وانتو كنتوا صغار..

اليوم وبعد ٣٠ سنة، انتو صرتوا قدّنا..ونحنا يلي كُنا صبايا حلوين كبرنا شووي..ايه
شووي.. ما تنقروا.. صحيح في قسم مّا صار ختيار، قسم مريض، قسم مات، بسّ
هّني معنا..نحنا مكفايين وعنا ارادة وتصميم..

بحب تعرفوا اتو نحنا ما اخترنا نكون أهالي مفقودين..أنا مثلاً ما اخترت اتو
ينخطف زوجي، ولا ولادي اختاروا يكونوا ولاد مخطوف، مريم ما اختارت انا
تصير أم مفقود وولادا يصيروا اخوة مفقود، ولا أوديت ولا أم تيسير ولا أم
محمد... في حدا تاني كان عم يختار عنا كل الوقت..حدا تاني اختار اتو نحنا
نقضّي ٣٠ سنة بالشارع..اختار عنا كيف منفر، شو منحس، كيف مّام وكيف
مننوج..

واليوم بعدو هوّي ذاتو عم يختار عنا، عم يجبرنا اتو نمشي فوق عضام رجالنا
وولادنا.. اتو نسكت وما نقول شي..اتو نعيش نحنا وانتو فوق مقابر ، نخرس وما
نفتح تمّنا..!!

خلص بعد فيكُن تتحمّلوا كذب وتلطي ورا حكي وشعارات عن الأخلاق ومجد لبنان
مهد الأديان والثقافات... وطبعاً الكرم اللبناني وسيخ اللحمية وصحن الحمص!! بعتمد
اتو ما في شعب بالعالم قدر يعمل يلي نحنا عملناه..بفتكر ما حدا قدر يرقص فوق
مقبرة جماعية، نحنا.. قدرنا..!!

قولكُن، شو لازم نعمل تا نرجع نصير بشر؟

مثل ما سبق وقلت، في كتار منكُن ماكان معو خبر، بسّ اليوم صرتو بتعرفوا..يعني
بكرّا تغيّر لأنكُن صرتو بتعرفوا..

بكر ارح تفكروا بهالشي انتو ورايحين عا مدارسكن، جامعاتكن، عا مكاتبكن، عا أشغالكن، انتو وراجعين عا بيوتكن، رايحين عالسهرة، عالسینما ووين ما كنتو..

اليوم، لأتو صرتو بتعرفوا.. صارت مسؤوليتكن.. يعني انتو بتقررّوا كيف بدكن تعيشوا.. كيف بدكن تكملوا!!!

اليوم، بظنّ ما بقا لازم نحكي بسّ عن أهالي المفقودين، لأنن ما بقاهن لوحدن.. اليوم خبرتكن، باسم الأهالي، هيدا السر يلي هني بيعرفو وعاضين عليه من ٣٠ سنة وناظرين هاللحظة تيسألوكن: انتو.. شو رح تعملوا بكر؟ انتو.. شو رح تقرروا؟ كانت قضيتنا عنوانها" من حقنا أن نعرف"، من اليوم صار عنوانها "من حقكم أن تعرفوا"..

اذا بتسمحو لي ارجع شوّي لولاد المفقودين، حابة اعترف وقلن نحنا منعرف اتو في أوقات قصرنا وما اهتينا فيكن مثل ما لازم.. في مرّات زعلانن وما قدرنا نلبيلكن كل حاجاتكن ورغباتكن.. ويمكن في حدا منكن حس بأوقات اتو فقد امّو مش بسّ بيو لأنو أنجأ كان عم يشوفا.. تأكدوا اتو هلي عملنا ما كان بسّ تا نرجع الأحباب.. عملناه لأنو منحكن وبدنا ياكّن تعيشوا بأمان.. بتمنى تسامحونا..

بحب قلكن اتو يلي قدرنا نوصلو عا مدار ٣٠ سنة ما تستهينوا فيه.. وثقنا كلو.. لهيك منتمنى انكن تنتبهولوا كتير منيح، وخصوصاً مشروع الحل يلي رسمنا بعد هالمسيرة الطويلة.. هوّي عسارة نضالنا والمدخل لخلصنا.. بنظرنا هوّي الخريطة والطريق والباب لحل قضية المفقودين ووين ما كانوا.. منتمنى تحمله، تطوره اذا حسيتو لازم هالشي..

منتمنى كمان انكن تفكروا بالمفقودين يلي بعدون طيبين، شو لازم تعملوا حتى يرجعوا لعيلن ولأهلن قبل ما يصير الوقت مآخر..

يا ولادنا، يا كل شباب وصبايا لبنان، انتو مش لحالكن رح تحملوا، نحنا رح نبقي حدكن، وجربوا تخلّوا كل الناس يكونوا معكن تا تكملوا مشوار الحقيقة والكرامة والعدالة.. وتا تمنعوا مسلسل الخطف يلي رجع من أول وجديد يطل براسو.. ويهدّد كل واحد بهالبلد.. كل واحد منا صار في خطر عليه وعم يحسب ايمتى جايي دورو..!!

منتمنى انو هلي قدرنا نزرعو عا مدار هالسنين يزهر عا ايديكن.. ونعرف شو صار مع بيّاتكن واخواتكن.. شو صار مع الـ١٧٠٠٠ يلي انخطفوا وانفقوا

2012 11 17 - 0001 d - 2

بہالبد..ساعتا کلنا منرتاح وکل الأھالی حتی یلی ماتوا قبل ما یعرفوا شو صار
بولادن..

ساعتا منکون فعلاً بلشنا نکتب تاریخ، بلشنا نحسّ اتو فعلاً عایشین بوطن..أنو
صرنا مواطنین.. انو رجعنا بشر.